

Cooperaziun sin il sectur sanitar

Tschintg chantuns planiseschan cuminaivlamain il provediment sanitar staziunar

DA MARTIN CABALZAR/FMR

■ Per l'emprima giada en la politica da sanadad da la Svizra vulan tschintg chantuns cooperar tar la planisaziun dal provediment sanitar staziunar. Ier han Grischun, Appenzell Dador, Appenzell Dadens, Glaruna e S. Gagl sutscrit a Rapperswil-Jona ina decleraziun d'intenziun. Cun questa decleraziun han ils chantuns numnads accentuà lur intenziun da cooperar cuminaivlamain tar la planisaziun da las purschidas staziunaras en ils ospitals. En il center stattan il basegn e la segirezza da provediment da la populaziun. L'intenziun è da garantir in provediment sanitar da basa d'alta qualitat. En quest connex duain las glistas d'ospital dals singuls chantuns vegnir armonisadas ed en il cas ideal e nua che quai fa geograficamain senn schizunt unifitgadas. «Uschia pon ils chantuns nizzegiar las sinergias da planisaziun e stgaffir las premissas per franar ils custs creschents da la sanadad publica, quai ch'è la finala er en interess dals assicurads che pajan las premias», scrivan ils directurs chantunals da sanadad.

Evitar sur- e sutcapacitads

Per ils directurs da sanadad èsi cler che la cooperaziun na dastga betg effectuar ni surcapacitads, sutcapacitads ni capacitads faussas dal provediment medicinal da la populaziun. Els èn plinavant da l'avis che las instituziuns dal sectur da sanadad na dastgan betg vegnir concentradas sin singuls chantuns, mabain esser repartidas commensuradamain sin l'entir territori. Ils chantuns participads èn conscients ch'ins po cuntanscher tras ina planisaziun coordinada megliers resultats a favur da pazientas e pazients.



Ils tschintg directurs da sanitar: Rolf Widmer (Glaruna), Yves Noël Balmer (Appenzell Dador), Heidi Hanselmann (S. Gagl), Antonia Fässler (Appenzell Dadens) e Peter Peyer (Grischun) (da san.).

FOTO N. ROTH

Medems criteris per la glista da spital

Ils chantuns numnads vulan cuntanscher quai cun far cuminaivlamain in'analisa respectiva e d'elavurar da cuminanza in rapport davart il provediment. Plinavant vulan els elavurar ed applitgar da cuminanza criteris unifitgads, transparents e liants cur ch'i va per surdar incumbensas da prestaziun, resp. decider tge instituziuns che vegnan recepidas en la glista d'ospitals. Sin tals criteris tutgan per exempel directives davart la cuntanschibladad, las plazzas da furmazium, las prentensiuns da qualitat sco er il dumber minimal da cas per secturs spezialisads.

Lavur da project cumenza immediat

Per che las lavurs possian vegnir instradadas tant pli spert installeschon ils chantuns immediat organisaziuns da project. Quellas vegnan mintgamai manadas dals directurs sanitar dals tschintg chantuns participads. Er il team operativ vegn a sa cumponer da differents commembers dals chantuns. In expert extern vegn a manar quest team da project.

En in emprim pass vegn il team da project ad examinar ils singuls criteris e lur effect sin fundament d'ina planisaziun da model. Cun las conclusiuns or da questas lavurs quintan ins en dus onns.

Effects sin ils projects chantunals

Il chantun Grischun è actualmain londervi da reveder la lescha davart la tgira da malsauns. Quella revisiun preveda da crear regiuns da provediment omogenas per ils secturs da las chasas da vegls e tgira, da la spitex e da la somatica acuta. En quest connex èsi previs da crear centers regiunals da provediment. Il project duai vegnir deliberà dal cussegl grond en la sessiun d'avust.

En il chantun S. Gagl elavura la regenza actualmain ina strategia per la rait d'ospitals. Quella cumpeggia er il svilup da las prestaziuns e da las structurass.